

ጳውሎስ ፊልጲሲዩሳ ኣሳስ ፃፊዳ ኪታ ጋሳ ቆፋ

ጳውሎስ ፊልጲሲዩሳ ኣሳስ ፃፊዳ ኪታይ ፃፊትዳይ፡ ርሜ ቢታን ማቄዶኒያ ኣውራጃን፡ ፊልጲሲዩሳ ቢታን ዳዒያ ዋሳ ኬላሳ። ሄ ዋሳ ኬላይ ጳውሎስ ኣወርጋ ቢታን ኮይሮ ኤሲዳ ዋሳ ኬላ። ሃ ኪታይ ፃፊትዳይ፡ ጳውሎስ ቃሾ ኬላን ዳዒያ ዋዳ ሃራ ኣማኒያ ኦሳንቸት ኢያ ኢዲዳ ዋዳይ ፊልጲሲዩሳ ዋሳ ኬላን ዳንዲዳ ዋርዶ ተሚርቲያ ጋሶን ኢያ ዋዛናይ ዳሮ ኣዛኒዳ ዋዳ። ጊዶሺን፡ ጳውሎስ ዩሱስ ኪሪሰቶሳ ሚንሉዲ ኣማኒያ ጊሾ ሃ ኪታን ቆንጨዲ ቤንቴይ፡ ኡፋይሲኔ ኩሚላ ኣማኔቴላ። ፊልጲሲዩሳን ዳዒያ ዳሮ ኣሳይ ርሜፔ ዲዔቲዲ ዩዳ ኣሲ። ኤንቲ ርሜ ቢታስ ሚሹቶሶናኔ ሎይላ ናጎሶና። ኤንታፊ ኢሶቲ ኢሶቲ ኣማኒዲ ባንታ ቢታ ኣሳን ጎዴቲዶሶና። ሄ ጎዳይ ኤንታ ቦላ ሚቶኔ ማንቆቴላ ኤሂስ (ሃ.ኦ 16:20-21)።

ጳውሎስ ሃ ኪታ ፃፊዳ ኮይሮ ጋሶይ ኢያ ማቲዋ ዋዳ ኢያ ማዳናው ፊልጲሲዩሳ ኣማኒያ ኣሳይ ኢሞታ ኢያው ዩዲዳ ጊሾ ኤንታ ጋላታናሳ። ኢያ ቦላኔ ኤንታ ቦላ ዲማ ዲማ ሚቶይ ጋኪዳባ ጊዲኮካ ኤንቲ ሚኔታና ማላኔ ኩሚላ ኣማኔቲዲ ዳና ማላ ሃ ዳሚዳ ኢንጂያን ኤንታ ሚንሉሌስ። ጨቆኔ ኦቶሮ ኣገዲ፡ ዩሱስ ኪሪሰቶሳ ኣሽኬቴላን ኤንቲ ኩማና ማላ ሚንሉዲ ኤንታ ኣኬኪሴስ። ዩሱስ ኪሪሰቶሳራ ኢሲፊ ጊዶን ኤንቲ ዳሚዳ ዳያይ ያሳ ኣጶ ኬሃቴላፊ ፑልቲዳይሳኔ ኣማኖን ኤንቲ ኤኪዳይሳፊ ኣቲን ኣይሁዳታ ዋጋ ፖሎን ቤንቴዳባ ጊዶናይሳ ኤንታ ኣኬኪሴስ። ዩሱስ ኪሪሰቶሳራ ኢሲፊ ዳዒያ ኡባስ ያሳይ ኢሚያ ሳሩዋኔ ኡፋይሳ ኤንታው ፃፊስ።

ሃ ኪታይ ኤሬቴይ ኡፋይሲ፡ ኣማኔቴላ፡ ኢሲፊቴላኔ ኣማኖን ሚኒዲ ዳያ ቆንጨሲዲ ቤሴይሳና። ሄሳ ቦላ ጉጂዲ፡ ጳውሎስ ፊልጲሲዩሳ ዋሳ ኬላ ሲቂያ ጊታ ሲቁዋ ቆንጨሴስ።

ፊልጲሲዩሳ ኪታ ኣይፊ ቆፋታ

- ጌሎ ቆፋ 1:1-11
- ጳውሎስ ሃኒዲ ዳዒያ ዲሳ 1:12-26
- ኣማኖን ለሚሶ ዳያ 1:27-2:18
- ዊሞቲዮሳሲኔ ኤጳፊራዲቱስ ዳዒያ ቆፋ 2:19-30

ሞርኬታፔኔ ኢታታፔ ናጌቴሌ 3:1-4:9
ጳውሎሳኔ ፊልጲሲዩሳ ኣማኒያ ኣሳ 4:10-20
ሳሮሶኔ ኣንጅ 4:21-23

1 ኪሪሰቶስ ዩሱሳራ ኢሲፊዳ ጊሾ ያሳባ ጊዲዳ፣ ፊልጲሲዩሳ ካታማን ዴዲያ ዋሳ ኬላ ጨማታሲኔ ዳቆኔታ ኡባሰ። ዩሱሰ ኪሪሰቶሳ ኣይሌ ጊዲዳ፣ ጳውሎሳፔኔ ዪሞቲዮሳፔ ኪቴቲዳ ኪታ።

2 ኑ ኣዋ ያሳፊኔ ጎዳ ዩሱሰ ኪሪሰቶሳፔ ኣቶ ኬሃቴላይኔ ሳሮቴላይ ሂንቴው ጊደ።

ጳውሎሳ ጋላታ ዋሳ

3 ታኒ ሂንቴና ቆፒያ ዋዴ ኡባን፣ ታ ያሳ ጋላታይሰ። 4 ታኒ ሂንቴ ኡባሰ ያሳ ዋሲያ ዋዴ ኡፋይሳን ዋሳይሰ። 5 ሂንቴ ኮይሮ ጋላሳፔ ሃዲ ጋካናው፣ ዋንጌላ ማርካቴይሳን ታራ ኢሲፊ ጊዲዲ፣ ታና ማዲዳ ጊሾ ያሳ ጋላታይሰ። 6 ሂንቴ ጊደን ሎዖ ኦሶ ደሚዳ ያሳይ፣ ኪሪሰቶስ ዩሱሲ ሲሚያ ጋላሳይ ጋካናው፣ ፖላናይሳ ኤራይሰ።

7 ሂንቴ ኡባ ዋዴ ታ ዋዛናን ዴዴታ። ታኒ ኡባ ዋዴካ ሃሳዳ ቆፓናው ቤሴሰ። ሃዲ ታኒ ቃሾን ዴዳሼኔ ቃሼታናፔ ሲንሌ ዋንጌላ ናጎኒኔ ዋንጌላ ሚንላ ኤሶን ያሳይ ታው ቃዲዳ ቃዳ ሂንቴካ ታራ ሻኬቲዳታ። 8 ታኒ ሂንቴና ኡባ ኪሪሰቶስ ዩሱሳ ሲቁዋን ኣይ ማላ ላሞቲያኮ ያሳይ ታው ማርካ።

9 ሂንቴ ሲቆይ ቱማ ኤራቴላራኔ ኣኬካራ ኢሲፊ ጉጂ ጉጂ ዲጫና ማላ ያሳ ዋሳይሰ። 10 ሃሳን ሂንቴ ሎዖባ ሻኪዲ፣ ደራይሳታ፣ ኪሪሰቶሲ ሲሚያ ጋላሳን ጌሻታኔ ቦሬቶናይሳታ ጊደና። 11 ሂንቴ ዴዖይ ያሳ ቦንቹዋሲኔ ጋላታሰ ዩሱሰ ኪሪሰቶሳ ባጋራ ቤንቴያ ዪሎቴላ ኣይፊያን ኩሚዲ ኣይፋና።

ጳውሎሳ ቃሼቴላይ ዋንጌላይ ዳልጋና ማላ ማዲሰ

12 ታ ኢሻቶ፣ ታና ጋኪዳ ኡባይ ዋንጌላይ ዳልጋና ማላ ቱማ ማዲዳይሳ ሂንቴ ኤራና ማላ ኮያይሰ። 13 ታኒ ኪሪሰቶሳ ጊሾ ቃሼቲዳይሳ፣ ካዋ ኬላ ናጌይሳቲኔ ሃይሳን ዴዲያ ሃራቲ ኡባይ ኤሮሶና። 14 ታ ቃሹዋ ጋሶን ኑ ኢሻታፔ ዳሮቲ ጎዳን ኬሂ ኣማኔቲደሶና። ሃሳ ጊሾ፣ ያሳ ቃላ ያሺ ባይና ካሴይሳፊ ኣቶ ሚኒዲ ኦዳና ማላ ሚናቴሌ ዴሚደሶና።

15 ጊደሺን፣ ኢሶቲ ኢሶቲ ቃናቴኒኔ ፓላማን ኪሪሰቶሳባ ኦዶሶና፣ ሺን ሃራቲ ሱሬ ዋዛናፔ ኦዶሶና። 16 ሱሬ ዋዛናፔ ኦዶሰቲ፣ ያሳይ ታው ዋንጌላ ናጎ ኦሶ ኢሚዳይሳ ኤሪያ ጊሾ ሲቆን ኦዶሶና። 17 ሺን ታና ቃናቴይሳቲ ታ ቃሹዋ ቦላ ሃራ ማቶ ኤሃናባ ኤንታው ዳኒን ባንታና ዶሲዲ ኪሪሰቶሳባ ኦዶሶናፔ ኣቲን ቱማ ዋዛናፔ ኦዶሶና።

18 ሄሲ ኣይኮካ ማቴና። ቱማ ኦጌን ጊዲን ዋይኮ ዋርዶ ኦጌን ጊዲን ሄ ኡባን ኪሪሰቶሲ ሳባኬቴሰ። ታና ሄሲ ኡፋይሴሰ። ቃሲ ሃራባይ ታና ኡፋይሴሲያባይ። 19 ታኒ ሂንቴ ዋሳኒኔ ዬሱሰ ኪሪሰቶሳ ኣያና ማዲዋን ኣታናይሳ ኤሪያ ጊሾ ታና ኡፋይሴሰ። 20 ታ ጊታ ኣዋይኔ ኡፋይሳን ናጊያ ናጎይ ታ ዬሳቶና ኣታናይሳ። ሺን ኡባ ዋዶ ኦፊይሳዳ፣ ሃዲካ ታኒ ፓፃ ዳዲን ዋይኮ ሃይቂን ያዮና ታ ኩማላ ኣሳቴላን ኪሪሰቶሲ ቦንቼታና ጋዳ ሚናቴላን ኦዶሰ። 21 ታ ዳዲኮካ ኪሪሰቶሳ ፃላላሰ ዳዳይሰ፤ ቃሲ ታ ሃይቂኮካ ታው ኣጲዳ ዋዴ። 22 ሺን ታ ፓፃ ዳዲኮ ኣይፊይ ዳዲያ ኦሶ ኦላና። ሺን ፓፃ ዳዳይሳፊኔ ሃይቆፔ ኣዉሳ ዶራኔኮ ታው ኤሬቴና። 23 ታኒ ሃ ናምባታፔ ኣዉሳ ዶራኔኮ ኡንዴታሰ። ሃ ዳዑዋፔ ሻኬታዳ ኪሪሰቶሳራ ኢሲፊ ዳናው ኣዋታይሰ፤ ኪሪሰቶሳራ ኢሲፊ ዳዳይሲ ኡባፊ ኣጲዳ ሎዎ። 24 ሺን ታኒ ሂንቴ ጊሾ ፓፃ ዳዳይሲ ሂንቴው ዳሮ ኮሺያባ።

25 ሄሳ ታኒ ጌሻዳ ኤራይሰ፤ ታኒ፣ ሂንቴ ኣማኖን ዲጫናዳኔ ኡፋይታናዳ ሂንቴራ ፓፃ ዳና። 26 ሄሳ ጊሾ፣ ታኒ ሂንቴኮ ሲማዳ ያ ዋዶ ኪሪሰቶሰ ዬሱሳራ ሂንቴ ዳዲያ ዳዑዋን ታናን ዳዲያ ጨቁቴላይ ሂንቴው ዳራና።

27 ኡባፊ ኣሊዲ፣ ሂንቴ ኪሪሰቶሳ ዋንጌላሰ ቦንቾ ኤሃያ ዳዎ ዳዳቴ። ታ ሂንቴና ቤዲን ዋይኮ ቤዶና ኢዲን ሂንቴ ኢሲ ቆፋን ሚኒዲ ኡቁዳ፣ ሃራቲ ዋንጌላን ኣማናና ማላ ኢሲ ዋዛናን ጊዲዲ ኢሲፊ ባፃቴይሳ ታ ሲዳና። 28 ሂንቴ ሞርኬታሰ ያዮፊቴ። ኤንቲ ሂንቴራ ኤቁቴያባ ጊዲኮ ሄሲ ሂንቴው ኣቶቴላሰ፣ ኤንታው ጳዮሰ ያሳፊ ጊዲዳ ማላ። 29 ኪሪሰቶሳሰ ኦሊያ ቃዳይ ሂንቴው ኢማቴዳይ፣ ሂንቴ ኢያ ኣማናና ማላ ፃላላ ጊደናሺን ሂንቴ ኢያ ጊሾ ማቶ ኤካና ማላሳ። 30 ሄሳ ጊሾ፣ ሂንቴ ታ ዋያ ካሴ ቤዲዳታ፤ ሃዲካ ታ ዋዩቴይሳ ሲዴታ። ሂንቴካ ታ ዋያ ማላ ዋዩቴታ።

2

ቱማ አሽኬቴሌ

1 ኪሪሰቶስን ሂንቴ ደዒያ ደጋይ ሂንቴና ሚንጮስ፤ ቃሲ ኢያ ሲቆይካ ሂንቴና ሚንጮስ። ጌሻ አያናራ ሂንቴው ኢሲፊቴሌ ደዔስ፤ ሂንቴ ሃራታስ ከሄታኔ ቃዴቲታ። 2 ሂዛ፣ ሂንቴ ኢሲ ቆፋን፣ ሲቆን፣ ኢሲ ዋዛናኒኔ እያናን ኢሲኖ ጊዲዲ ታና ፖሎ ኡፋይሲቴ። 3 ሂንቴና ዶሶን ዋይኮ ጨቁቲያ ሃዳ አሞን ኢሲባካ አላፊቴ። ሺን ሂንቴ ኢሶይ ኢሱዋፊ ገታታይስ ያጊዲ ቆፖና ሂንቴና ካዉሺቴ። 4 ሂንቴ ኢሶይ ኢሶይ፣ ሃራ ኣሲ ማዲያባ ኮዪቴፔ ኣቴን ሂንቴና ማዲያባ ፃላላ ኮዮፒቴ።

5 ኪሪሰቶስ ዬሱሳን ደዒያ ቆፋይ ሂንቴናን ዳናው ቤሴስ።

6 ኢያው ኡባ ዋዴ ያሳ ሃኖቴሌ ደዔስ።
ያኒያ ጊሾ፣ ኢያ ያሳራ ኢሲኖ ኦሌያ ሃኖታ።
ዋልቃን ኤካናው ኮዪቤና።

7 ጊዶሺን፣ ኢ ባው ደዒያ ቦንቹዋ ኡባ ኣጊዲ፣
ኣይሌ ማዴታ ኤኪስ፤
ኣሴ ዳኒዲ ቆንጨሲ።

8 ኢ ባና ካዉሺስ፤
ሃይቃና ጋካናው፣
ሃሪ ኣቶሺን ማሰቃሊያ ቦላ
ሃይቃናው ከቴቲስ።

9 ሃሳ ጊሾ፣ ያሳይ ኢያ ዳር ቶቁ ቶቁ አሊስ፤
ቃሲ ሱንሳ ኡባፊካ ኣዲያ ቶቃ ሱንሳ ኢሚስ።

10 ሳሎኒኔ ሳዓን፣
ሳዓፔ ጋርሳን ደዒያ ኡባይ፣
ዬሱሳ ሱንሳ ቦንቹዋስ ጉልባታና።

11 ኣሳ ኡባይ ባንታ ኢንፃርሳን፣
ዬሱስ ኪሪሰቶሳ ጎዳ ያጊዲ፣
ያሳ ኣዋ ቦንቹዋስ ማርካታና።

ሃ ኣላሚያስ ፖፖ ጊዶ

12 ታ አሻቶ፣ ታኒ ሂንቴራ ደዒያ ዋዴ ኡባን ሂንቴ ከቴቲዳይሳዳ፣ ሃዒ ታኒ ሂንቴ ማታፔ ሃኪንካ፣ ካሴይሳፊ ኣሊዲ፣ ከቴታናው ቤሴስ። ያሳስ ያሻኒኔ ኮኮርሳን ሂንቴ ኣቶቴላ ፖላናው ኣሊቴ። 13 ያሳይ፣ ሂንቴ ኢያው ኤር ጊዲ ከቴታና ማላ ኡባ ዋዴ ሂንቴ ጊዶን ኣሊስ።

14 አይ ኦሶ ኦሊሼካ ዙዙሞና ወይኮ ፓላሞና ኦሊቴ። 15 ጌላኔ ናጋራንቸ አሳ ጊደን ቦሪቶናይሳታ፣ ጌሻታኔ ፖኮይ ባይና ያሳ ናይታ ጊዲቴ። ሂንቴ ኤንታ ጊደን ሳሎ ያሊንቶዳ ፖሊሼ፣ 16 ዴያ አሚያ ኪታ ኤንታው ኦዲቴ። ሄ ወዴ ታ ዳቡሪሳይኔ ታ ኦሶይ ማላ ኣቲቦና ጊሾ ኪሪሰቶሲ ያ ጋላሰ ታ ሂንቴናን ጨቁታና።

17 ሂንቴ ያሳሰ አሚያ አማኖ ኢሞታ ቦላ ታ ሱላይ ኡሻ ያርሾዳ * ጉኪኮካ ታና ኡፋይሴሰ። ሂንቴካ ታራ ኡፋይታና። 18 ሄሳዳ ሂንቴካ ኡፋይቲዲ ታናካ ኡፋይሳናው ቤሴሰ።

ዲሞቲዮሳኔ ኤጳፊራዲቲሳ

19 ታኒ ሂንቴ ዴቡዋባ ሲዓዳ ኡፋይታናው ዲሞቲዮሳ ሂንቴኮ ኤሌሳዳ ዬዳና ማላ ጎዳ ዬሱሲ ታና ማዳናይሳ አማኔታይሰ። 20 ሂንቴ ዴቡዋሰ ዋዛናፔ ቆፒያ ኢያ ማላ አሲ ሃሪ ኦኒካ ባዋ። 21 ሃራቲ ባንታና ጎዲያባ ኮዮሶናፔ ኣቲን ዬሱሰ ኪሪሰቶሲ ኮያባ ኦሎኮና። 22 ኢ ታራ ኢሲፌ ጊዲዲ ናዲ ባ አዋሰ ኦሌይሳዳ ዋንጌላ ኦሶ ኦሊዲይሳኔ አማኔቲያ አሲ ጊዴይሳ ሂንቴ ኤሬታ። 23 ሄሳ ጊሾ፣ ታባይ ሃኒያባ ቤዓዳ ኤሌሳዳ ኢያ ሂንቴኮ ዬዳና ጋዳ ቆፓይሰ። 24 ታኒ፣ ታ ሁዔን ማታ ወዴን ሂንቴኮ ባናይሳ ጎዳን አማኔታይሰ።

25 ሄሳዳካ፣ ታኒ፣ ታ ኢሻ ኤጳፊራዲቲሳ፣ ታራ ኢሲፌ ታ ባጋ ጊዲዲ ኦሊዲይሳ፣ ኦሌቲዲይሳኔ፣ ታና ማዳናው ሂንቴው ኪቲቲዲይሳ፣ ሂንቴኮ ኪታናው ቆፓሰ። 26 ኢ ሂንቴና ኡባ ቤዓናው ዳሮ ላሞቲሰ። ቃሲ ኢ ሃርጌቲዲይሳ ሂንቴ ሲዒዳ ጊሾ ባ ዋዛናን ዳሮ ኡንዔቲሰ። 27 ኢ ቱማ ሃርጌቲዲ ሃይቁ ኪቺዲ ኣቲሰ። ሺን ያሳይ ኢያው ቃጴቲሰ። ኢያ ፃላላሰ ጊደናሺን ኣዛናይ ኣዛና ቦላ ጉኩቶናዳ፣ ታወካ ቃጴቲሰ።

28 ሂዛ፣ ሂንቴ ኢያ ዛሪ ቤዒዲ ኡፋይታናዳ ታወካ ታ ዋዛና ሴላይ ኢርፃናዳ ታኒ ኢያ ኤሌሳዳ ሂንቴኮ ዬዳናው አሞታይሰ። 29 ጎዳሰ ሃጋዚያ አሳዳ ኢያ ኩሚላ ኡፋይሳን ሞኪቴ። ቃሲ ኢያ ማላ አሳ ኡባካ ቦንቺቴ። 30 ሂንቴ ታ ማታን ጊዲዲ ኦላናው ዳንዳያና ማዲያ ማዲዲ ኪሪሰቶሳ ኦሱዋ ጊሾ ባ ሼሞፑዋሰ ሚሼቶና ኢዲዲ ሃይቁ ኪቺዲ ኣቲሰ።

2:15 ዛሪ 32:5 * 2:17 ታ ሱላይ ኡሻ ያርሾዳ፣ ኢሲ ኢሲ ወዴ ያርሾ ቤሳን ያርሹቲያ ማሄ ያርሹዋ ቦላ ሃሌ ወይኮ ወይኔ ኡሻይ ጉኩሰ።

3

ቱማ ዲሎቴላ

1 ወርሴላን፣ ታ አሻቶ፣ ሂንቴ ጎዳባ ገዲያ ገሾ ኡፋይቲቲ። ታኒ ካሴ ፃፊዳይሳ ዛራዳ ፃፋናይሲ ታና ዋይሴና፣ ሺን ሂንቴና ባላፔ ናጋና።

2 ኢታባ ኦሊያ ካናታ፤ ቃሲ ቃፃሬታናው ኮሺሰ ገያ ኢታ አሳታፔ ናጌቲቲ። 3 ኑኒ ያሳ ጌሻ አያናን ጎይኒያ ገሾኔ ኑ ዴቦዋን ከሪሰቶሰ ዩሱሳን ጨቁቲያ ገሾ ቱማ ቃፃሮ ቃፃሬቲዳይሳታ። ኑኒ ካሬ አሳቴላ ቦላ ኦሴቲያባን ጨቁቶኮ።

4 ታ ካሬ አሳቴላን ጨቁታናው ኮሺኮ ታ ዳሮባን ጨቁታናው ዳንዳዳይሰ። አይ አሲካ ባ ካሬ አሳቴላን ጨቁቲያባይ ዳው ዴዔሰ ገዲ ቆፒኮ፣ ታኒ ኢያፔ ዳሮ አጳዳ ጨቁቲያባይ ዴዔሰ።

5 ታኒ ዩሌቲዳ ሳሚንታራ ቃፃሬታሰ። ታኒ ዩሌታን አሰራዔሌ፤ ታኒ ቢኒያሜ ዛሬ፤ ታኒ ዋላኪ ባይና አይሁዴ አሴ። አይሁዴ ሂኔ ናጎን ገዲኮ ታኒ ፋሪሳዌ። 6 አይሁዴ አማኑዋሰ ሚሽቴላን ገዲኮ ታኒ ዋሳ ኩላ ዩዳሳሰ። አሲ አሲ ሂኔ ናገዲ ዲሊያባ ገዲኮ፣ ታናን ቦሬይ ቤንቲቤና።

7 ሺን ካሴ ታና ማዴሰ ጋዳ ቆፒዳባ ኡባ፣ ከሪሰቶሳ ገሾ ጋዳ ማደናባ ኦላዳ ታይባሰ። 8 ሄሳ ፃላላ ገደናሽን ታኒ ታ ጎዳ ከሪሰቶሰ ዩሱሳ ኤሬይሲ ሃራባ ኡባሬ ዳሮ አጳያ ገሾ ሄ ኡባ ዋጄይ ባይናባዳ ታይባሰ። ታኒ ኢያ ገሾ ኡባባ ጳያሰ። ከሪሰቶሳ ዴማናው ኡባባ ዋራ ሆሌቲዳ ቡሬዳ ታይባይሰ። ታኒ ዩሱሳራ አሲኖ ገደሰ። 9 ታኒ ሂኔሰ ኪቲታዳ ዴሚያ ታ ሆዔ ዲሎቴላ ታው ባዎ። ከሪሰቶሳ አማኒን ቤንቲያ ዲሎቴላይ፣ ያሳ ማታፔ ያ ዲሎቴላይ ሃዒ ታው ዴዔሰ። 10 ታኒ ከሪሰቶሳኔ ኢያ ዴንዶ ዋልቃ ኤራናው ኮያይሰ። ታኒ ኢያ ማቱዋ ኢያራ ሻኬታናዉኔ ኢያ ሃይቁዋን ኢያ ዳናናው አሞታይሰ። 11 ሄሳዳካ፣ ሃይቆፔ ዴንዳዳ ሜሪናው ዴያን ዳናይሳ ኡፋይሲ ኦላይሰ።

ጋፃ ጋካናው ዋፃቲ

12 ታኒ ሃዒ ጋፃ ጋካሰ ዋይኮ ታናን ባሊ ባዋ ገኬ። ሺን ከሪሰቶሰ ዩሱሲ ታና ኦይኪዳ ገሾ ታኒ ታ ሲንላን ዴዒያ ዋይቱዋ ኦይካናው ዋፃይሲኔ ቡቲታይሰ። 13 ታ አሻቶ፣ ታኒ ሄሳ ዴማሰ ጋዳ ቆፒኬ፣ ሺን ታኒ አሲባ ኦላይሰ። ታፔ ጉዬራ ዴዔይሳ ዶጋዳ ሲንላን ዴዔይሳ ኦይካናው ዛቲራይሰ። 14 ሄሳ ገሾ፣ ታኒ ጋፃ

3:5 ሃ.ኦ 23:6፤ 26:5፤ ሮሜ 11:1 3:6 ሃ.ኦ 8:3፤ 22:4፤ 26:9-11

ጋካናው ዋፃይሰ። ያሳይ ኪሪሰቶስ ዩሱሳ ሳጋራ ሳሎ ደዑዋስ ጭጊዳ ዋይቱዋ ኤካናው ዳቡራይሰ።

15 ሂዛ፣ ኩኒ ኢያናን ጋሽቲዳ ኡባይ ሄሳ ቆፓናው ቤሴሰ። ሂንቴፌ ሳጋታስ ዲማቲያ ቆፊ ዳዒኮ፣ ሄሳካ ያሳይ ሂንቴው ቆንጨሳና። 16 ጊዲኮካ፣ ኩኒ ሃኖ ጋካናው ዳዒዳ ደዑዋን፣ ኣኔ ሲንጼ ቦሰ።

17 ታ ኢሻቶ፣ ታና ዳኒቲ፤ ሄሳዳካ፣ ኩ ለሚሱዋ ካሊያ ኣሳታ ኣኩኪዲ ቤዒቲ። 18 ታኒ ሄሳ ሂንቴው ካሴ ዳሮ ቶሆ ኦዳሰ፣ ሽን ሃዒካ ዛራዳ ኣፋላን ኦዳይሰ። ኪሪሰቶሲ ማሰቃሊያ ቦላ ሃይቂዳይሳስ ባንታና ሞርኬ ኦሊዳ ዳሮ ኣሳቲ ዳዖሶና። 19 ኤንታ ወርሴላይ ጳዮ፤ ኤንታ ኡሎይ ኤንታው ያሴ። ዩላታናው ቤሲያባን ኤንቲ ጩቁቶሶና፤ ቃሲ ሃ ሳዓባ ፃላላ ቆፖሶና። 20 ኩ ቢታይ ሳሎዋና። ሳሎፔ ዩዲ ኩና ኣሻናው ዳዒያ ጎዳ ዩሱስ ኪሪሰቶሳ ናሰ። 21 ኪሪሰቶሲ ኡባባ ባ ማታፔ ጋርሳን ኦላናው ዳንዳዒያ ባ ዋልቃን ኩ ዳቡራንቾ ኣሳቲላ ላሚዲ ባ ቦንቾ ኣሳቲላ ዳኒሳና።

4

ወርሴላ ዞሬ

1 ታ ኢሻቶ፣ ታ ደሴይሳቶ፣ ታ ላሞቲይሳቶ፣ ታና ኡፋይሴይሳቶ፣ ታና ጊታዬይሳቶ ሂዛ ጎዳን ሚኒዲ ኤቂቲ።

2 ኤዋዲኔ ሲንጻካ፣ ሂንቴ ናምዒይ፣ ኢሲ ቆፋን ሚቹዳ ጎዳን ዳናዳ ታኒ ሂንቴና ዘራይሰ። 3 ታራ ኦሊያ ኣማንጼይሶ፣ ኔኒ ሃ ማጫሳታ ማዳና ሜላ ታ ኔና ዋሳይሰ። ሃ ማጫሳቲ ታራ፣ ቄሌሚንጾሳራኔ ኤንታ ሱንሳይ ያሳ ዳዖ ማፃፋን ፃፊቲዳ ሃራታራ ኢሲፌ ዋንጌላ ኡባ ቤሳ ጋላናው ዳቡሪዶሶና።

4 ጎዳራ ሂንቴ ዳዒያ ደዑዋን ኡባ ዋዴ ኡፋይቲቲ። ታኒ ሄሳ ጉጃዳካ ኦዳይሰ፤ ኡፋይቲቲ።

5 ኣሳ ኡባይ ሂንቴ ኣሽኬቲላ ኤር፤ ጎዳይ ማታን ያና። 6 ያሳ ሂንቴ ዋሲያ ዋዴ ኡባን ኢያ ጋላቲሼ፣ ሂንቴና ኮሺያባ ኡባስ ዋሲቲፔ ኣቲን ኣይቢባሰካ ሂርጎፊቲ። 7 ኣሳ ኤራቲላ ኡባፌ ኣጂያ ያሳ ሳሮቲላይ፣ ሂንቴ ዋዛናኔ ሂንቴ ቆፋ ጎዳ ዩሱስ ኪሪሰቶሳ ሳጋራ ናጋና።

8 ወርሴላን፣ ታ ኢሻቶ፣ ሂንቴ ዋዛናን ሎዖባኔ ጋላቲሲያባ ቆፒቲ። ቲማ ጊዲያባ ኡባ፣ ቦንቾባ ኡባ፣ ቆሆ ጊደናባ ኡባ፣ ጌሻባ ኡባ፣ ሲቆባ ኡባኔ ኡፋይሲያባ ኡባ ቆፒቲ። 9 ሂንቴ ታፔ

ታማሪዳባ፣ ኤኪዳባ፣ ሲዒዳባኔ ቤዒዳባ ኡባ ኦሊቱ። ሳርቴላ ኢሚያ ያሳይ ሂንቴራ ኢሲፌ ጊዳና።

ጳውሎሲ ኢሜቲዳ ኢሞታስ ጋላቲስ

10 ዳር ዋዴፍ ጉዬ፣ ሂንቴ ታባ ዛሪዲ ቆፓናው ደሚዳ ጊሾ ታኒ ጎዳን ዳር ኡፋይታይስ። ሄሳ ጉሳይ፣ ታው ቆፓናው ሂንቴው ኢንጄቶና ኢዲዳይሳፌ ኣቲን ታው ቆፋ ኣጊቤኬታ። 11 ታኒ ሄሳ ታና ማቲዳ ጊሾ ጊኬ፤ ታው ዳዒያባይ ጊዳና ጉሱ ታማራስ። 12 ታኒ ማቶቲቲዲ ዳዒያ ዲሲ ኤራይስ፤ ቃሲ ዲሬቲዲ ዳዒያ ዲሲካ ኤራይስ። ኡዒን ጊዲን ቃሲ ኣይ ዋዴካ ታኒ ካሎኔ ኮሻ፣ ፓጩኔ ፓላሃ ታማራስ። 13 ኪሪሰቶሲ ታው ኢሚያ ዋልቃን ኡባባ ኦላናው ዳንዳዒይስ።

14 ጊዲኮካ፣ ሂንቴ ታ ማቲዋ ታራ ኤኪዳይሳን ሎዖ ኦሊዴታ። 15 ፊልጲሲዩሳ ኣሳው፣ ዋንጌላ ኮይሮ ኦዳናው ታኒ ማቄዲያፍ ኬያ ዋዴ ኢሚያባንካ ኤኪያባንካ ሂንቴ ዋሳ ኬላፌ ኣቲን ሃሪ ታና ማዲቦናይሳ ሂንቴ ኤሬታ። 16 ቴሴሎንቄን ማቶይ ጋኪዳ ዋዴካ ታና ዛሪ ዛሪዲ ማዲዴታ። 17 ታኒ፣ ሂንቴፌ ኢሞታ ኤካናው ኮያዳ ጊዳናሺን ኢሞፍ ያ ኣንጂዋ ሂንቴ ኤካና ማለሳ።

18 ታኒ፣ ሂንቴ ኢሚዳ ኡባኔ ጊዲዲ ፓላሂይሳ ኤካስ። ሂንቴ ዬዲዳ ኡባ ኤጳፊራዲቲሳፍ ኤካስ፤ ኮሺያባ ኡባይ ታው ዳዒስ። ሂንቴ ታው ዬዲዳ ኢሞይ ያሳስ ሳዋ ቶንጉ ጊያ፣ ኢ ደሲያ፣ ኢ ኡፋይቲያ ያርሾ ማላ። 19 ታ ያሳይ ባ ቦንቾ ዲሬቲላፌ፣ ኪሪሰቶስ ዬሱሳ ባጋራ ሂንቴው ኮሺያባ ኡባ ኢሚና። 20 ኑ ኣዋ ያሳስ ማሪናፍ ማሪና ጋካናው ቦንቾይ ጊዳ። ኣሚንዒ።

ወርሴላ ሳርታ

21 ኪሪሰቶስ ዬሱሳ ባጋራ ያሳባ ጊዲዳ ኡባ ሳር ጊቱ። ታራ ዳዒያ ኢሻቲ ሂንቴና ሳር ጎሶና። 22 ያሳባ ጊዲዳ ኣሳ ኡባይ፣ ኡባፌ ኣሊዲ ካወዋ ቁሳሬ ኬላን ዳዒይሳቲ ሂንቴና ሳር ጎሶና።

23 ጎዳ ዬሱስ ኪሪሰቶሳ ኣዶ ኬሃቴላይ ሂንቴራ ጊዳ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022
c35d6c73-3843-5482-b53e-7559d35deee5